

瀛

環

志

略

序

吉甫撰郡縣之志未盡域中景純注山海之經空談荒外良以地理之學難精而滄溟之大尤不易知也五臺徐松龕中丞博學多聞兼綜條貫嘗與論歷代典章制度以及前言往行無不元元本本考核精詳又以其餘釐正古書鉤稽戎索軼亥章之步盡儵忽之疆囊括鯢程包舉鼃奠著爲瀛環志略若干卷自東南海島諸國西至蒲昌鹿渾北極伊連渤鞮其疆域之延袤道里之遠近創建因革之故山川民物之名前史所未詳博物所不紀靡不瞭如示掌浩若吞胸聽鄒衍之談天小儒咋舌覽木華之賦海才士傾心蓋公自觀察此邦駐旌泉郡值番舶通商之際正譯書畢集之

時鰌鱖魚鞞圖披王會象胥龍節職在周官固已訪埵影於酉陽
獲鱗書於丙穴鰌更可數犀照無遺泊乎攄柔遠之蓋枕膺巖壘
之重寄三山甘雨萬里恬波既覩十郡之康遂續九邱之志寒暑
再易勒爲一編洋洋乎宇宙之鉅觀古今之絕業也夫六合之外
聖人以不論存之千歲之日智者可坐而致之故詢天之高廣則
仲尼子貢不能知極人之短長則樵僂防風可以決豈非無徵者
不信多識者有功歟是書博采前賢箸述正其舛誤得所折衷帝
虎魯魚無訾後世石華海月廣綴前聞洵堪備史館之參稽恢職
方之紀載者矣公今宣力閩疆渥承

宸眷勳猷所至譽望日隆方將黼黻球圖焜煌鐘鼎移海國見聞

之筆作太平實字之書錫文錦以招來毀毛車而更造上佐
天子布大德於埏紘下綏黎元樂匡生於衽席豈惟是書之成爲
足縱橫八極表示千祿而已哉

道光二十八年歲在著雍涒灘長洲愚弟彭蘊章拜譔

地輿廣矣重譯之外耳目所不及無稽之說羣起而簧鼓之欲折以理無由也松龕中丞治閩政通人和旁及柔遠之略得泰西人所繪地圖反覆詢譯參以史錄所紀訂其舛誤閱五年成瀛環志略一書凡各國之沿革建寅與夫道里風俗人情物產咸備焉暇日出以相示披讀一過覺荒陬僻壤無不如指掌紋如燭幽寐而又於奇奇怪怪之中芟夷古今荒唐之說歸於實是以是歎見聞果確理無不通而公之不憚旁搜博採積歲月以成此書者非公之好奇正公之精於窮理也

慶偕

幸與參訂之役謹跋簡末以志

服膺

道光戊申秋八月會稽陳慶偕謹跋

序

天下有道守在四裔王者不勤遠略而德意所涵濡威靈所震撼類皆有囊括區夏甄鑄埏埴之勢故禹貢紀要荒周官有職方氏之掌東南置侯西北置尉至於王母呈圖鬼方效順凡夫乾坤之所開陰陽之所接九夷八蠻之國如在幕庭蓋自羲軒以迄姬周之盛鮮不由此我

國家金甌鞏奠淳風邕洽罔有內外悉主悉臣幅員之廣超古軼今其已隸典屬奉正朔歲時貢獻修職而來者固已駢蹄接踵摩肩延頸懽忻奔走相望於道矣卽至窮髮赤裸焦齒臬矐之國負固匪茹開亦難馴而德威所播帖然就軌由是海宇鏡清飛艘雲集

表裏肅清中外禔福於鑠乎盛哉洵建中之上儀混一之隆軌也
中丞徐松齋先生以渰雅之才兼文武之畧文章經濟炳爍一時
筮仕已來徧歷海疆近開府七閩時

天子

方有事於柔遠倚先生爲長城畀以東南重任先生沈毅靜鎮又
推誠待物宣揚仁風恩威並濟遠人安之相與婆娑嘯吟鼓腋而
笑時古大秦所分諸國悉遣渠酋航海梯山翕然屬至先生撫綏
之暇每咨訪其形勢得所謂地球圖並泰西人所繪各國地圖暨
東南海島諸國山川風土物產習尙與夫古今沿革變遷之故瞭
如指掌又考訂古籍著爲之說此瀛環志略一書所由作也且夫
四裔之荒非查客所能周歷也重譯之遙非章亥所能盡履也六

幕之大四維之廣非局踣一隅執管測蠡者所能臆度也是故傳
十賁之文鄉不離夫連石探九梯之穴國尙限於挹婁寸覩咫聞
非所以邳張乾樞樸貫埜紐也夷考山海經所傳怪奇悄恍荒誕
而難憑至穆天子乘八駿馬周游八極而瑤華所載疆索不詳降
及逸史方言權輿於爾雅濫觴於稗海其書亦往往行於世而言
人人殊徵實則繆若先生以淵淵著作之材精心考證麟麟炳炳
足以補廣雅廣記所未逮他日藏之

祕府頒在學官備輶車之咨采佐史宓之蒐稽振古鑒奇之士饋餉
靡窮而於

國家撫馭之策控制之方實有裨益緝熙

帝圖潤色鴻業此物此志也夫豈第遠搜僻壤博采叢書侈招撫之富

夸聞見之奇已哉澤不敏曩嘗監司浙東厯沿海諸郡邑近復奉

檄來閩因得從先生之後勤理通商事務時與泰西諸國人相往來亦欲有所采擇成一家之言而才有未逮靡所取裁觀先生此書躊躇滿志不翅遺我以測土之圭授我以縮地之術班孟堅云博我皇道宏我漢京方茲編矣昔在成周之世越裳來貢周公作指南車以歸其使他日有策日影而至者卽以此書爲指南之式也可謹書其沿起而爲之序

道光二十八年歲次戊申秋七月福山鹿澤長謹序

地理非圖不明圖非履覽不悉大塊有形非可以意爲伸縮也泰西人善於行遠帆檣周四海所至輒抽筆繪圖故其圖獨爲可據道光癸卯因公駐廈門晤米利堅人雅裨理西國多聞之士也能作閩語攜有地圖冊子繪刻極細苦不識其字因鈎摹十餘幅就雅裨理詢譯之粗知各國之名然匆卒不能詳也明年再至廈門郡司馬霍君蓉生購得地圖二冊一大二尺餘一尺許較雅裨理冊子尤爲詳密并覓得泰西人漢字雜書數種余復搜求得若干種其書俚不文淹雅者不能入目余則薈萃採擇得片紙亦存錄勿棄每晤泰西人輒披冊子考證之於域外諸國地形時勢稍稍得其涯畧乃依圖立說採諸書之可信者衍之爲篇久之積成卷

帙每得一書或有新聞輒竄改增補稿凡數十易自癸卯至今五閱寒暑公事之餘惟以此爲消遣未嘗一日輟也陳慈圃方伯鹿春如觀察見之以爲可存爲之刪訂其舛誤分爲十卷同人索觀者多憊患付梓乃名之曰瀛環志畧而記其緣起如此道光戊申秋八月五臺徐繼畲識

凡例

一此書以圖爲綱領圖從泰西人原本鈎摹其原圖河道脈絡細如毛髮山嶺城邑大小畢備既不能盡譯其名而漢字筆畫繁多亦非分寸之地所能注寫故河道僅畫其最著者山嶺僅畫其大勢城邑僅標其國都其餘一概從畧

一此書專詳域外葱嶺之東外興安嶺之南五印度之北一切蒙回各部皆我

國家候尉所治朝鮮雖斗入東海亦無異親藩胥

神州之扶翊不應闌入此書謹繪一圖於卷首明拱極朝宗之義而不敢贅一辭

一南洋諸島國葦杭閩粵五印度近連兩藏漢以後明以前皆弱
小番部朝貢時通今則胥變爲歐羅巴諸國埔頭此古今一大
變局故於此兩地言之較詳至諸島國自兩漢時卽通中國歷
代史籍不無紀載然地名國號展轉淆訛方向遠近亦言人人
殊莫可究詰轉不如近時閩粵人遊南洋者所紀錄爲可據此
書於南洋諸島國皆依據近人雜書而畧附其沿革於後五印
度現爲英吉利屬部皆依據泰西人書其歷代沿革過於煩瑣
且半涉釋典僅於篇中畧敘數語以歸簡淨

一西域諸部迤南之波斯天方諸國泰西人繪有分圖其葱嶺之
西裏海之東波斯愛烏罕之北俄羅斯之南泰西人繪爲一圖

總名爲達爾給斯丹

斯丹一作士丹西域言國主也元史訛爲算端又作算離

乃古時康居

大夏大宛大月氏奄蔡諸國歷代變更沿革亂如棼絲近世士大夫從軍西域者亦多所撰述今止就見於官書者約畧言之不敢涉考據之藩籬亦聊以藏拙云爾

一日本越南暹羅緬甸諸國歷代史籍言之綦詳今止就其現在

國勢土俗立傳而畧附其沿革於後至歐羅巴阿非利加亞墨

利加諸國從前不見史籍今皆遡其立國之始以至今日其古

時名國如巴庇倫

今土耳其其東土

波斯

即今波斯

希臘

今土耳其其西土

猶太

即拂菻今土耳其

其東土

羅馬

即大秦今意大里亞列國

厄日多

即麥西在阿非利加北境

非尼西亞

即加爾達額在

阿非利加北境

之類皆別爲一傳附於今本國之後庶幾界畫分明不

涉牽混

一泰西諸國疆域形勢沿革物產時事皆取之泰西人雜書有刻本有鈔本并月報新聞紙之類約數十種其文理大半俚俗不通而事實則多有可據諸說間有不同擇其近是者從之亦有晤泰西人時得之口述者湊合而敷衍成文期於成片段而已取材既雜不復注其出於某書也

一泰西人如利瑪竇艾儒略南懷仁之屬皆久居京師通習漢文故其所著之書文理頗爲明順然夸誕詭譎之說亦已不少近泰西人無深於漢文者故其書多俚俗不文而其敘各國興衰事蹟則確鑿可據乃知彼之文轉不如此之樸也

一外國地名最難辨識十人譯之而十異一人譯之而前後或異蓋外國同音者無兩字而中國則同音者或數十字外國有兩字合音三字合音而中國無此種字故以漢字書番語其不能脗合者本居十之七八而泰西人學漢文者皆居粵東粵東土語本非漢文正音展轉淆訛遂至不可辨識一波斯也而或譯爲白西轉而爲包社巴社訛而爲高奢余嘗令泰西人口述之則曰百爾設又令其筆書之則曰比耳西今將譯音異名註於各國之下庶閱者易於辨認然亦不能遍及也

一泰西人於漢字正音不能細分斯也士也是也實也西也蘇也混爲一音而刺與拉無論矣土也都也度也杜也多也突也混

爲一音而撒與薩無論矣故所譯地名人名言人人殊

一泰西各國語音本不相同此書地名有英吉利所譯者有葡萄牙所譯者英人所譯字數簡而語音不全葡人所譯語音雖備而一地名至八九字詰屈不能合脗如花旗之首國英人譯之曰緬葡人譯之曰賣內賣讀如美內讀如呢今姑用以紀事無由知其孰爲是非也

一地名中亞字在首者皆讀爲阿在尾者多讀爲訝加字多讀爲嘎平聲亦有讀爲家者內字皆讀平聲音近尼疴字讀如訶

一各國正名如瑞國當作瑞典噠國當作噠馬西班牙當作以西把尼亞葡萄牙當作波爾都噶亞然一經更改閱者猝不知爲

何國故一切仍其舊稱

一外國地名人少者一字多者至八九字絕無文義可循數名連寫閱者無由讀斷今將地名人悉行鈎出間加圈點以醒眉目明知非著書之體姑取其便於披閱耳

瀛環志略

卷一

月
便

四

瀛環志略

五臺徐繼畲松龕輯著

會稽陳慶偕慈圃
福山鹿澤長春如
沁水霍明高蓉生
參訂採譯

目錄

卷一

地球

亞細亞

皇清一統輿地全圖

亞細亞東洋二國

亞細亞南洋濱海各國

卷二

亞細亞南洋各島

亞細亞東南洋大洋海各島

卷三

亞細亞五印度

亞細亞印度以西回部四國

亞細亞西域各回部

卷四

歐羅巴

歐羅巴義羅斯國

歐羅巴瑞國

歐羅巴噠國

卷五

歐羅巴墨地利亞國

歐羅巴普魯士國

歐羅巴日耳曼列國

歐羅巴瑞士國

卷六

歐羅巴土耳其國

歐羅巴希臘國

歐羅巴意大利亞列國

歐羅巴荷蘭國

歐羅巴比利時國

卷七

歐羅巴佛郎西國

歐羅巴西班牙國

歐羅巴葡萄牙國

歐羅巴英吉利國

卷八

阿非利加各國

卷九

亞墨利加

北亞墨利加水疆

北亞墨利加英吉利屬部

北亞墨利加米利堅合衆國

卷十

北亞墨利加南境各國


南亞墨利加各國


亞墨利加海灣羣島

崧縣續新德
堂弟繼堦校字
甥薄于達

| | | | |
|--|--|--|--|
| | | | |
|--|--|--|--|

地球圖






瀛環志畧

卷一

地球圖



地球

地形如球以周天度數分經緯線縱橫畫之。每一周得三百六十五度。每一度得中國之二百五十里。海得十之六有奇。土不及十之

四。

泰西人推算甚詳茲不贅

地球從東西直剖之。北極在上。南極在下。赤道橫繞地球之中。日馭之所正照也。赤道之南北各二十三度二十八分。爲黃道限。寒溫漸得其平。又再北再南各四十三度四分。爲黑道。去日馭漸遠。凝陰沍結。是爲南北冰海。

地球從中間橫剖之。北極南極在中。其外十一度四十四分。爲黑道。再外四十三度四分。爲黃道限。再外二十三度二十八分。赤道

環之。

按北冰海人人知之。南冰海未之前聞。頃閱西洋人所繪地球圖。於南極之下。註曰南冰海。以爲不通華文。誤以北冰海例稱之也。詢之米利堅人雅神理。則云此理確鑿。不足疑也。赤道爲日馭正照之地。環繞地球之正中。中國在赤道之北。卽最南濱海之閩廣。尙在北黃道限內外。較之北地。寒暖頓殊。遂以爲愈南愈熱。抵南極而石爍金流矣。殊不知日馭所行。乃地球正中之地。由閩廣渡海而南。水程約五六千里。而至婆羅洲一帶。乃正當赤道之下。其地隆冬如內地之夏。初然再南而至南黃道限之外。其氣漸平。再西南而至阿非利加之岷朴。則已見霜雪。

島亞墨利加之海灣羣島皆商艘數至之地也。

土之外皆海也。一水汪洋誰爲界畫。就各土審曲面勢。強分爲五。

曰大洋海。曰大西洋海。曰印度海。曰北冰海。曰南冰海。

大洋海者。由亞細亞之東。抵南北亞墨利加之西。卽中國之東。洋。

大海。泰西人因其風浪恬平。謂之太平海。洋面之廣闊。以此爲最。

蓋環繞地球之半矣。米利堅人謂赴粵買茶。由此路可近三萬里。

因其過岷處太險。山之盡頭且汪洋數萬里。無添備水食之處。卒

亦罕有行者。

大西洋海由歐羅巴阿非利加之西。至南北亞墨利加之東。遠者

萬餘里。近者不足萬里。

印度海。北至亞細亞。東至澳大利亞。西至阿非利加。由適中之印度一土而南望。故西人以此稱之。卽中國之南洋。暨所傳之小西洋。

北冰海者。亞細亞。歐羅巴。北亞。墨利加。三土之北境。環而拱之。近岸千百里。霜雪凝結。堅冰不解。海有大魚。能吞舟。莊子所謂北溟有魚。其名爲鯢者。始謂是歟。

南冰海在南極之下。氣候與北冰海相若。

亞細亞有阿勒富海。

在波斯阿刺伯之間

又有紅海。

泰西名勒爾西

皆由印度海

分注。歐羅巴有地中海。

泰西名墨力特爾勒尼安一作美的德拉底

又有黑海。

泰西名勒

必又有黃海。

泰西名波羅的海

皆由大西洋海分注。惟亞細亞西境之

鹹海一名死海又名鹽海泰西名亞裏海泰西名喀爾士必則
拉爾西域稱為達里岡阿泊
與大海絕不相通蓋本大澤強名之為海耳

亞細亞圖

北

大洋海即東
洋大海又名
太平洋



印度海又

亞細亞

亞細亞。本土耳其。買諾古時地名。

土耳其西土國名有東中西三土其中土名買諾今稱小亞細亞

亞泰西人於此土之東。統名曰亞細亞。幅員之廣。爲四土之最。居

是土者。爲中國之十八省。東三省。內。外。蒙。古。諸。都。新。疆。回。疆。青。海。

前。後。藏。其。北。際。海。爲。俄。羅。斯。之。東。境。其。東。濱。海。藩。國。曰。朝。鮮。海。中。

三。島。曰。日。本。又。小。島。曰。琉。球。其。南。與。中。國。之。滇。粵。諸。省。毗。連。者。曰。

安。南。暹。羅。緬。甸。南。掌。散。布。南。海。之。中。者。曰。南。洋。羣。島。其。西。北。與。新。

疆。回。疆。毗。連。者。曰。西。域。諸。回。部。其。西。南。與。兩。藏。毗。連。者。曰。廓。爾。喀。

曰。五。印。度。再。西。爲。阿。富。汗。俾。路。芝。波。斯。諸。回。部。再。西。南。爲。阿。刺。伯。

回。部。再。西。北。爲。土。耳。其。之。東。土。即猶太諸部再。西。爲。土。耳。其。之。中。土。買。

諾所謂小亞細亞者也。北距北冰海。東距大洋海。南距印度

海。即南海及西距紅海。地中海。黑海。是為亞細亞之全土。

按我羅斯境土。在亞細亞者十之六。而其國都在歐羅巴之波羅的海。隅土耳其東中兩土在亞細亞。而其建都之西土亦在歐羅巴。兩國分圖俱歸之歐羅巴。紀其實也。


皇清一統
輿地全圖


瀛環志畧

卷一

皇清一統輿地全圖

十三





皇清一統輿地全圖

亞細亞以中國為主。疆域之界畫。山川之形勢。人人知之。不煩觀。縷我。

國家龍興。艮維奠基。遼瀋吉林一省。東盡赫哲費雅諸部。黑龍江一

省。北跨外興安嶺。周迴萬餘里。皆自古重譯不到之地。至若旃裘

毳幕。碁布北庭。內外蒙古諸部雪嶺天山。蟠迴西域。新疆回疆襄平箕子之遺


封。朝鮮烏斯吐蕃之舊部。青海西藏昔限異方。今歸典屬。輶車往復。畿赤

無殊。且又

內府圖志。考據綦詳。諸子百家。論述尤夥。非卮言之所能盡。亦非外史之所宜言。謹摹

皇朝輿地全圖於卷首而說不贅焉。

東洋二國圖



東洋二國

東洋浩渺一水直抵亞墨利加之西界數萬里別無大土附近中國者止有日本琉球二國蓋神州之左翊也

西洋人海圖將日本三島列朝鮮以北係

屬錯誤彼市舶罕到東洋就所傳聞者以意爲之耳茲據海國聞見錄更正之

日本古稱倭奴其國在東海中平列三大島北曰對馬島與高麗

南境相直一夜可達明季關白爲亂者是也中曰長崎土較大與

浙海普陀山相直內地商船互市於此南曰薩峒馬與浙之溫台

相直人強健刀最利兼產馬明嘉靖年間擾閩浙之倭寇薩峒馬

也三島之外小島甚多王居長崎之東北地名彌耶穀譯曰京官

皆世祿仍漢制稱刺史二千石文字同中國讀以倭音國事柄於

上將軍王不干預。僅食厚糈。受方物。上將軍有時展觀而已。歷代以來。不爭王而爭上將軍。故上將軍第宅時更新。主而王無易姓。以寬永爲年號。歷世不改。立法嚴。人少鬪爭。犯法者輒走山谷。自殺。呼童僕鳴掌。則應。竟日不聞人聲。好佛。敬祖先。得香花佳果。必供佛。或走獻祖墳。俗尙潔。街衢時時掃滌。男女皆大領闊袖。女加長以曳地。繪染花卉。裱裏帛幅。著短襪。曳絲履。男髡鬚而薙頂額。畱鬢髮至腦後。闊寸餘。縮爲髻。髮長者剪之。女多美髮。日洗滌。薰以楠沈。前後挽髻。插玳瑁簪。其男女眉目肌理。髣髴華土。信東方秀氣之所鍾也。長崎與普陀東西對峙。水程四十更。六十里橫洋爲一更。剪渡風浪極險。廈門至長崎水程七十二更。由臺灣雞籠山之北。

渡米糠洋。香簾洋。北風從五島門進。南風從天堂門進。前明中葉。大西洋之葡萄牙。嘗欲據其海口。又以天主教誘其土人。日本與之戰。荷蘭以兵船助日本。葡萄牙遁去。故其國與通商者。中國與荷蘭而已。所產者。紅銅。硫磺。海菜之類。節採海國聞見錄

顧亭林天下郡國利病書云。倭奴隣三韓而國故名韓。中倭後自惡其名。更號日本。在東南大海中。依山島而居。地方數千里。爲畿五。曰山城。曰太和。曰河內。曰攝津。曰和泉。共統五十三郡。爲道七。曰東海。統一百十六郡。曰南海。統四十八郡。曰西海。統九十三郡。曰東山。統一百二十二郡。曰北陸。統三十郡。曰山陽。統六十九郡。曰山陰。統五十二郡。爲島三。曰伊岐。曰對馬。按海國聞

見錄稱日本平列三大島其迤北者名對馬島而此所云對馬島止統兩郡蓋對馬本北境小島之名後來遂以爲北境總名余嘗見日本人所作廣對馬島賦倣選體極瑰麗自注云島小不足賦故廣言之亦一證也日多襲各統二郡地皆依水附巽郡之大者不過中國一村落戶可七萬課丁八十萬有奇國王一姓歷世不易初號天御中主居築紫宮其子號大材雲尊自後皆以尊爲號傳世三十二至彥瀲尊第四子號神武天皇徙太和州強原宮傳至守平天皇凡四十一世復徙都山城國其國文武僚吏皆世官自兩漢時始通中國魏晉以後得五經佛教於中土於是沙門之教盛行唐貞觀間嘗遣使往諭宋初遣國僧齋然浮海貢獻太宗賜紫衣厚存撫之其傳國已六十四世矣

按後漢書倭在韓東南大海中依山島爲居凡百餘國自武帝滅朝鮮後通漢

者三十許國。大倭王居邪馬臺國。男子皆黥面文身。男女無別。飲食以手。俗皆徒跣。云云。是。日本在漢時。并非一國。土俗與諸番島無異。其文字官制。自是兩漢通中國後始學得之。此所云六十四世。溯之當在商周。其國王一切名號。當係通華文後增飾爲之耳。又元史世祖至元間。遣的黑由高麗往諭日本。日本不納。又命祕書監趙良弼往。日本始遣使臣彌四郎來。然良弼再往。皆僅至其太宰府。未至王京。十一年。命經略忻都等。以舟三百載兵一萬五千人。征之。入其國。敗其兵。矢盡而還。十八年。命范文虎阿塔海將兵十萬。以戰船九百。征日本。至平壺島。大風破舟。文虎等乘堅船遁還。棄十餘萬衆於山下。盡爲日本所殲。得還者三人而已。後再議征討。以劉宣言而止。又明史洪武四年。日本國王良懷遣僧祖朝來貢。七年以後。屢寇山東浙江沿海。

備之。永樂元年。國王源道義遣使入貢。賜以金印。仍寇抄不已。十七年。總兵劉江大破倭於望海埭。俘斬二千餘人。由是稍斂迹。嘉靖初。國王源義植幼闇。不能制命。羣臣爭貢。僧宗設與僧瑞佐在甯波爭坐次相仇。遂大肆殺掠。屢寇甯台。徽人汪直爲倭舶渠魁。奸民徐海。陳東。毛烈。並引倭爲寇。沿海騷動。王忬督師至浙。薦材勇將俞大猷等。大有斬獲。旣而罷去。以張經督軍務。大破倭於王江涇。因趙文華譏搆論死。倭遂犯蘇松諸郡縣。所至殘破。胡宗憲爲總督。以計誘殲徐海。俘麻葉。陳東。復誘汪直內渡。斬之。賊渠畧盡。而汪直餘黨趨閩。海大肆殺掠。屢破郡邑。宗憲尋被逮自殺。命戚繼光。劉顯。俞大猷協力剿閩廣賊。屢

戰克捷。擒斬畧盡。倭患始息。萬厯二十年。倭酋平秀吉寇朝鮮。秀吉者。薩摩州人。販魚爲業。關白信長關白日本官名收養之。能畫策。會信長爲其下所殺。秀吉平其亂。遂居關白之位。以誘劫降六十六州。朝鮮之金山。與日本對馬島相望。時朝鮮王李昖。酒秀吉謀取其國。遣其渠行長清正率舟師數百艘。逼釜山鎮。朝鮮望風潰。王奔平壤。復奔義州。倭遂入王京。剽府庫。八道幾盡沒。王復奔避愛州。遣使告急。朝議救之前軍失利。兵部尙書石星議遣人探之。嘉興無賴子沈惟敬應募往。尋以李如松爲東征提督。襲平壤大捷。斬級千二百餘。皆焚溺死。行長遁還龍山。官軍乘勝輕進。敗於碧蹄館。已而封貢之議起。石星主之。爲

倭所紿。乃再議東征。以邢玠總督薊遼。楊鎬駐天津。倭渠清正攻南原。守將楊元棄城遁。官軍退守王京。麻貴攻尉山。垂克而遽收軍。官軍尋大潰。死者萬餘。時劉綎以川兵至。約行長爲好會。行長以五十騎來。綎伏兵欲擒之。行長馳去。無何平秀吉死。諸倭引兵歸。劉綎等邀擊之。有斬獲。倭遂揚帆去。諸帥以大捷聞。論功有差。沈維敬以通倭棄市。云余嘗謂日本一國。端端大海之東。制倣周漢。文同斯邈。非以寇攘爲俗者。自通中國以來。雖共球不時至。而未嘗西向遺一矢。付之度外。何損華威。元世祖雄心夸肆。忽欲強以臣妾。招諭不從。威以兵力。無端舉十萬之師。坑之海外。輪臺旋悔。不謀再舉。倭人自是遂有輕中國之

心有明一代。寇掠頻仍。馴至東南半壁。蹂躪無完宇。而朝鮮亦幾遭蠶食。皆由元人爲之禍始也。我

國家龍興遼瀋。聲靈先播。賜谷扶桑。片土驚慄。有年故靜守東隅。不敢箕踞向漢。又禁絕貢舟。我之估帆往而彼之市舶不來。二百年中。遂相安於無事。信籌邊自有良策矣。

元王惲汎海小錄云。由對馬島六百里。踰一岐島。又四百里。入容浦口。又二百七十里。至三神山。其山峻削。羣峯環繞。海心望之。鬱然爲碧芙蓉也。上無雜木。惟梅竹靈藥。松檜杪羅等樹。其居民多徐姓。自云皆徐福之後。海中諸嶼。此最秀麗。方廣十洲記所云海東北岸。扶桑蓬邱瀛州。周方千里者也。余按三神山

本方士夸誕之說用以欺誑人主。果卽係日本附近小島。則當日船交海中。何爲求之不得。後漢書倭國傳稱。會稽海外有夷洲及澶洲。秦始皇遣方士徐福將童男女數千人入海求蓬萊神仙。不得。徐福畏誅不敢還。遂止此洲。世世相承。有數萬家人。民時至會稽市。王惲小錄所云。或卽夷洲。澶洲之類。至三神山之名。其爲傳會無疑也。泉州陳資齋提軍倫少時嘗附商舶遊日本。言其風土甚悉。云日本人皆覆姓單姓者。徐福配合之童男女也。徐福所居之地名徐家村。其塚在熊指山下。云徐家村熊指山。不知在日本何地。蓋華人入倭。自徐福始。其遺民年久繁衍。遂散布於通國。倭人通中國文字。當係君房教之。特海外

遠夷輶車罕至。往來者皆商賈之流。無由探悉其原委耳。

琉球在薩峒馬之南。東洋小國也。周環三十六島。皆海中拳石。其國都之島較大。南北四百餘里。東西不足百里。舊分山南山北中山三國。後并入中山爲一。故稱中山王。王尙姓。自紀載以來。一姓相傳無改。步國小而貧。逼近日本。屬役良苦。自前明世修貢職。我國家煦育寬濫。體卹尤至。其貢舟三年一至。許其販鬻中土之貨。免其關稅。舉國賴此爲生。王薨則世子遣使請

命。例遣文臣二人爲正副使。

賜一品服。持節航海。冊其世子爲中山王。故其國之風土。多有能言之者。由福州之五虎門放洋。用卯針。約四十餘更。至孤米山。其國之

大島也。再東卽至其國。國分三路。曰首里。曰久米。曰那霸。由內地往收泊。必於那霸。其地商賈萃集。爲大都會。王居首里山。山之脊也。國與中國同文。官之最尊者。爲金紫大夫。歲得俸米百石。以次遞殺。守土之官。曰按司。一按司所轄。約六七里。土磽瘠。產米絕少。以地瓜爲食。卽番薯。非官與耆老。不食米。地無麻絮。以蕉爲布。類織蒲。負戴者。圍下體。餘皆裸露。海風最烈。屋瓦常飛。故構屋甚卑。簷與肩齊。王居與使館較。軒昂以大繩繫柱。而釘於地。防海風也。其士大夫以黃帛爲冠。似浮屠氏之冠。大領博袖。繫帶。

周海山尙書。嘗使琉球。著中山志云。琉球自古未通中國。隋時有海船望見之。始知有其地。因其島巔紆蟠如虬龍流動之形。

故稱爲流虬。後乃改爲琉球字。唐宋以後。漸通中土。明初入貢。太祖賜以閩人善操舟者三十六姓。修貢職甚謹。封舟頻往。後爲日本所滅。王被虜。不通音信者數十年。已而遣使來言。王被執不屈。倭送還復國。由是復修職貢如常期云。余按琉球東洋小島。受役於倭。貧弱不能自存。惟賴貢舟販鬻。稍得餘資以餬口。資本皆貸於日本。販回之貨。運往日本者八九。國人貧甚。不能買也。其國比之南澳平潭。差大。而不及臺灣之半。蓋滄海之一粟耳。然累世效貢職。受正朔。遂爲東海藩臣。比於朝鮮交趾。國貴自立。豈不信哉。

南洋濱海


各國圖

瀛環志略

七洲洋

南洋

三



南洋濱海各國

亞細亞大地。由中國之西南。斜伸入海。迤邐漸削。至彭亨。息力而盡。東爲中國之南洋。西爲小西洋。中間大國三。曰越南。曰暹羅。曰緬甸。小國一。曰南掌。四國內附多年。南掌彈丸地。不濱海。今記南洋諸國。連類及之。

越南卽安南。古之交趾。秦以後。唐以前。皆隸版圖。南界之林邑。漢末卽自立爲國。後稱占城國。安南至後五代時。乃列外藩。今并占城爲一國。復兼真臘。北境安南故地。南境占城。真臘故地。稱曰廣南。北界廣東。廣西。雲南三省。西界暹羅。東南面大海。都城曰順化。在富良江之南岸。衣冠仍唐宋之制。坐則席地。貴人乃施短榻。取

士用策論詩賦設鄉會科士大夫皆好吟詠詩或劣不成句而人喜爲之國分四十餘省一省所轄止數縣文武官名畧同內地總督皆阮姓王之族也貴官坐堂皇或解衣捫蝨其簡陋如此宴客設銅盤置蔬肉各少許無醯醢以醃魚汁代之鴉片之禁甚嚴犯者立寘重典東南臨海有都會曰祿奈或作祿賴一作龍奈一作農耐占城之故都也南境臨海有都會曰東埔寨真臘之故都也閩廣商船每歲往來貿易別國商船入港譏防甚嚴榷稅亦重諸國惡其煩苛故市舶罕有至者所產者番木沉楠諸香鉛錫桂皮象牙燕窩魚翅之類其入貢由廣西之太平府入關不由海道安南本中國地諸書言之

禁詳故不多贅

顧亭林天下郡國利病書云安南古交趾也。秦開嶺南以交趾隸象郡。漢武帝置交趾九真日南三郡。光武中興以任延錫光爲交趾九真守。教耕種制冠履。始知婚娶立學校。女子徵側徵貳反馬援討平之。建安中改爲交州。前五代並因之。唐初改安南都護府。安南之名始此。五季梁貞明中爲土豪曲承美所據。自是迭相奪。管内大亂。有丁部領者平之。宋乾德初上表內附。詔以部領爲安南郡王。自是始爲外夷矣。部領傳子璉及璿。大校黎桓篡之。傳二十年。至子龍廷爲李公蘊所篡。李氏傳八世二百二十二年。至李昊。昊無子女。昭盛立。避位于夫陳日照。詔封日照爲安南國王。傳至日烜。元世祖召使入覲。不奉命。大發

兵討之。尋遣使謝罪。修職貢。陳氏傳十二世。凡一百七十年。至明洪武二十一年。陳煒爲其國相。黎季犛所弑。季犛子蒼更名胡查。改國號曰大虞。永樂二年。老撾送曰。烜孫陳天平至。諭查迎還故主。查陽奉命。天平至。伏兵刦殺之。命朱能、張輔、沐晟等率兵討之。生擒黎季犛、黎蒼。即胡查遂復安南爲郡縣。立都布按三司。分爲十五府五州。後因中官馬騏貪黷。誅求盜賊。益起土官。黎利乘之爲亂。宣德元年。命王通、柳升討之。柳升敗死。王通棄地與利盟約而退。宣宗由是決意棄安南。黎利尋奉表謝恩。命利權署國事。黎氏傳十世一百十年。嘉靖元年。黎譔爲其臣莫登庸所篡。命仇鸞、毛伯溫討之。登庸面縛降。以爲安南都統。

使自是來貢不絕。云。按莫氏之後復爲黎氏所奪兼并占城

爲一國。稱占城爲廣南。以大酋阮氏世守之。漸成尾大。我

朝乾隆末年。黎維祁爲廣南大酋。阮光平所逼。棄國來奔。大兵征之。光平初拒命。尋乞降入朝。受封。傳子光纘。爲黎氏之甥。阮

福暎所滅。福暎請更國名。改封越南國王。至今世修貢職焉。

又天下郡國利病書云。占城古越裳氏地。在交州之南。秦爲象

郡。林邑縣。漢末大亂。功曹子區連殺縣令。自號爲王。謂之林邑

國。數世後。其王無嗣。甥范熊代立。傳子逸。晉咸康二年。逸死。夷

奴范文纂立。都典衝。侵擾交州。進寇九德。傳子佛孫胡達。屢寇

日南。九真。交州遂至虛弱。至胡達孫文敵。爲扶南所殺。大臣范

諸農平其亂。自立爲王。傳子陽邁孫咄。宋元嘉二十年。使宗慤檀和之討之。乃遣使朝貢。隋初未賓服。遣劉方甯長真伐之。其王梵志遣使謝罪。于是朝貢不絕。唐貞觀中。王頭黎死。子鎮龍被弑。立頭黎女爲王。國人不服。更立頭黎姑之子諸葛地爲王。妻以女。國乃定。周顯德五年。王釋利因德漫遣使朝貢。始自稱占城國。有宋一代屢入貢。時時與交州構兵。乾道四年。占城以舟師襲真臘。入其國都。慶元五年。真臘大舉伐占城。殺戮殆盡。俘其王以歸。國遂亡。其地悉歸真臘。因名占臘云。其後國王或云真臘人。或云占城恢復。無可據者。元世祖至元十五年。遣使貢方物。奉表降。十九年。以其國王孛由補剌者吾旣內屬。卽其

地立省而其子補的負固不服遣唆都征之自廣州航海至占
城港分遣陳仲達等由瓊州三道攻之入其國其王逃入山遣
使求歸順復潛殺使臣唆都轉戰至木城下阻隘不得進遂引
還後雖歸款終無順志明洪武元年遣使入貢二年遣行人吳
用賜以璽書自是常修貢職迄嘉靖年間朝貢不絕云余按
占城自漢末自立爲國相傳千有餘年後爲安南所并名其地
爲廣南今王安南之新阮舊阮皆由廣南藩封得國蓋江黃之
不祀久矣○又天下郡國利病書云真臘一名甘字智一作甘
作澈浦只又作干波又曰吉蔑本扶南屬國隋時始通中國唐
底阿俗稱東埔寨貞觀初并扶南而有之唐人虬髯客傳疑是寓言扶南卽狼臚國其先女

子爲王號曰葉柳

柳音聊

其南有徼國人名混浩來化葉柳遂以

爲妻惡其裸教著貫頭國內效之男子下體著橫幅曰水幔其

後天竺僧橋陳如有其國教國人事天神每旦誦經咒故易世

既久真臘重僧云唐永徽初并有鳩密富那伽乍武令僧高等

國神龍以後國分爲二其南近海號水真臘其北多山阜號陸

真臘後復合而爲一及滅占城號爲占臘役屬參半真里登流

明蒲甘

蒲甘卽細甸

等國各領聚落大者十餘地方七千餘里元元

貞中遣使招諭之乃始臣服明洪武永樂年間累次朝貢又云

真臘城周二十里戶口二萬餘石濠廣二十餘丈屬城三十各

數千戶王宮及官舍皆面東城門上有石佛頭五飾其中者以

金當國中有金塢金橋。王宮正室瓦用鉛。歲時相會。則羅列玉
猿孔雀白象犀牛於前。飲食用金盤金盃。故俗稱富貴真臘云。
又陳資齋海國聞見錄云。東埔寨介居兩大之間。東貢安南西
貢暹羅。稍有不遜。水陸各得并進而征之。余按據顧書則真臘
在明初尙稱富盛。據陳錄則真臘在國初尙存小國。今則爲
越南之嘉定省。不知何時夷滅。蓋安南雖累世通貢。而蠻觸相
吞。向無入告之說。故占城真臘之亡於何時。竟未有能言之者。
陳資齋海國聞見錄云。安南以交趾爲東京。以廣南爲西京。由
廈門赴廣南。取道南澳。見廣之魯萬山。瓊之大洲頭。過七洲洋。
取廣南外之咕啤羅山。而至廣南。計水程七十二更。赴交趾則

由七洲洋西繞北而進。計水程七十四更。七洲洋在瓊州府萬州之東南。往南洋者必經之路。中國商舶行海。以望見山形爲標識。至七洲洋則浩渺一水。無島嶼可認。偏東則犯萬里長沙。千里石塘。偏西則溜入廣南灣。舟行至此。罔不惕惕。風極順利。亦必六七日方能渡過。七洲洋有神鳥似海鴈而小。紅嘴綠脚。尾帶一箭。長二尺許。名曰箭鳥。行舟或迷所向。則飛來導之。俗傳紅毛船最畏安南。不敢涉其境。其人善於泅水。遇紅毛夾板。則遣數百人背竹筒。攜細纜。沒水釘於船底。從遠處登小舟。牽曳之。俟其攔淺。乃火焚而取其貨。又或謂安南人造小舟。名曰軋船。能攻夾板船底。故紅毛畏之。以今考之。皆不甚確。蓋占

城之北。海形如半月。海水趨灣。其勢甚急。海船或溜入灣內。無西風不能外出。紅毛夾板入溜。擱淺。曾敗數舟。故至今歐羅巴人涉海。以望見廣南山爲厲禁。商船入安南內港。土人皆用小船繫繩牽引。乃慮其擱觸礁淺。藉爲嚮導。卽中國各港之引水船。反用之以碎敵船。理或有之。惟沒水而釘船底。則事涉杳茫矣。至軋船之製。曾有繪圖倣造者。施之海面。仍無異常。船耳食之談。施之實事。往往鑿柄。正不獨此一事也。

澎湖有蔡進士名廷蘭者。爲諸生時。渡海遭颶風。飄至安南之廣義。王從陸路遣送歸。自廣義至諒山。歷安南十四省。所至之地。必有閩粵人聚處。各有庸長司其事。閩則晉江同安人最多。

蓋不下十餘萬也。所著安南紀程言之甚悉。

暹羅南洋大國也。北界雲南東界越南南臨大海西南連所屬各
番部西界緬甸西北一隅界南掌其地古分兩國北曰暹南曰羅
斛暹多山艱食羅斛傍水有餘糧暹乃降於羅斛合爲暹羅國國
有大水二一曰瀾滄江發源青海歷雲南入暹羅之東北境至東
埔寨入海一曰湄南河發源雲南之李仙把邊等河至暹北境會
諸水成大河至羅斛南境入海海口曰竹輿由竹輿入內港至曼
谷都城一作萬國長一千數百里水深濶容洋艘出入大城皆在河濱
最著者曰湛地門曰萬巴曬故都曰猶地亞在湄南河上游沿河
一帶居民皆架屋水中華人構瓦屋樓閣相望土人所居皆蘆葦

湄南河勢緩而散。田疇藉以肥沃。農時掉舟耕種。插秧畢而河水至。苗隨水長。不煩薅漑。水退而稻熟矣。米極賤。每石值銀三星。時載往粵東售賣。王衣文彩佛像。體貼飛金。用金皿乘象輦。以閩粵人爲官屬。理國政。掌財賦。俗崇佛。僧沿門募食。各施精飯。食餘則餉鳥雀。蘭若無舉火者。又信番僧符咒。一種人善咒法。刀刃不能傷。名爲其人。王養以爲兵衛。犯事應刑。令番僧以咒解之。方與施刑。西界有大城曰馬耳。大萬南界有大城曰刺郡。皆著名富庶之地。國之西南有斜仔六坤。宋卡大咩。吉連丹。丁噶奴。諸番部皆其屬國。所產者銀鉛錫沉香。束香。降香。象牙。犀角。烏木。蘇木。冰片。翠毛。牛角。鹿筋。簾席。佳紋。席。簾。黃大楓子。豆蔻。海參。燕窩。海菜。其入

貢由海道抵粵東。

天下郡國利病書云。暹羅國本暹與羅斛二國地。古赤土及波羅利也。暹國土瘠不宜耕藝。羅斛平行而多稼。暹人歲仰給之。隋大業三年。屯田主事常駿等自南海郡乘舟使赤土。至今訛傳爲赤眉遺種。元元貞初。暹人嘗遣使入貢。至正間。暹始降於羅斛而合爲一國。明洪武初。遣使朝貢。進金葉表。七年九年二十年皆入貢。二十八年遣內臣趙達宋福等使暹羅祭故王。賜其嗣王文綺。永樂元年遣使賀卽位。自是入貢不絕。十七年遣使諭其國王。俾與滿剌加平。卽麻喇甲十九年遣使貢方物謝侵滿剌加之罪。自正統至嘉靖間入貢如常期。云按暹羅自我

朝定鼎之後。修貢職尤恭謹。乾隆中國爲緬甸所滅。旋恢復。故王

無後。推立大僧鄭昭爲長。

昭中子華嗣立。

詔封爲暹羅國王。相傳至今焉。暹羅爲蠻方大國。隔以安南。緬甸與中國地界相接者。僅滇省邊徼之一隅。故自古無擾邊之事。而恪修貢職。自元明迄我

朝。五六百年無改易。可謂不侵不叛之臣矣。

海國聞見錄云。廈門至暹羅水程。過七洲洋。見外羅山。向南見玳瑁洲。鴨洲。見昆侖。偏西見大真與小真與。轉西北取筆架山。向北至竹嶼港口。計一百八十八更。入港又四十更。乃抵萬國都城。其水程二百二十八更。而由廈門至東埔寨。僅水程一百

十三更。何以相去甚遠。蓋東埔寨南面之海。盡屬爛泥。名曰爛泥尾。下接大橫山小橫山。是以紆迴外繞而途遠也。

暹羅流寓閩粵人皆有之。而粵爲多。約居土人六分之一。一有由海道往者。有由欽州之王光十萬山。穿越南境而往者。其地土曠人稀。而田極肥沃。易於耕穫。故趨之者衆也。然其國多蠱祟。信符咒。風俗政治。遠遜安南。蓋安南風隸版圖。漸被車書之化。而暹羅則終古荒服。僅達梯航。故宜其相逕庭也。

緬甸一名阿瓦。

種人之名

蠻部大國也。北界野夷。東北界雲南南掌。東

界暹羅。西南距印度海。西北連東印度。其都城距雲南省三十八程。山曰小豹。水曰怒江。一名潞江。又稱大金沙江。發源前藏。歷雲南

入緬界。潤五里。緬人恃以爲險。其俗剽悍。性多詐。有室廬以居。象馬以耕。舟筏以濟。其文字。進上者用金葉。次用紙。次用檳榔葉。謂之緬書。男子善浮水。縮髻頂前。用青白布纏之。婦人縮髻頂後。事佛敬僧。有大事則抱佛說誓。質之僧。然後決。國有五城。以木爲之。曰江頭。曰太公。曰馬來。曰安正。國曰蒲甘。緬王城。王所居也。其王稱達喇瓦底。向由雲南入貢。先是英吉利蠶食東印度諸部。將及緬界。道光四年。緬王率大兵迎擊之。英師敗績已而。英人以兵船入內港。卽怒江口緬人奮力搏戰。爲炮火所轟而潰。英師將逼都城。王不得已。議和。讓海濱曠土爲英埔頭。其西南曰馬爾達般。曰達歪。其西北曰阿喀喇。緬人時懷報復之志。尙未動也。

英吉利有新開之地曰阿

薩密在緬甸西北本土夷地英人從

東印度跨割有之詳五印度圖說

南掌

一作纒掌
卽老撾

北界雲南東界暹羅西南界緬甸地甚褊小本緬

甸別部

國朝內附貢馴象

天下郡國利病書云緬人古朱波也漢通西南夷後謂之撣唐

謂之驃宋元謂之緬自永昌西南山川延邈道里修阻因名之

曰緬也漢和帝永元五年撣國王雍繇調重譯奉珍寶賜以印

綬安帝永甯元年遣使朝賀獻樂及幻人唐德宗十八年驃國

王雍羌遣其弟悉利移來朝獻國樂其曲皆梵音經論憲宗元

和元年懿宗太和六年皆遣使來貢宋徽宗崇甯四年緬甸貢

白象五年蒲甘入貢

今緬甸
王城

高宗紹興間俱來貢元世祖至元

中由吐番三討之後。於蒲甘緬王城置邦牙等處宣慰使司。明
洪武間始歸附。永樂間遣翰林張洪使其地。正統間宣慰莽次
剗。繫麓川叛夷思任思機來獻。益以地。嘉靖初孟養思倫猛密
思真連兵侵緬。殺莽紀歲。緬訴於朝。委官往勘。不聽。嘉靖中紀
歲支子瑞體起洞吾。復有其地。東破纔掌。卽南南取土啞。進羅
攻景邁。服車里。囚思個。陷罕拔。號召三宣。爲西南雄。瑞體死。應
裏繼之。萬曆十三年。其族弟莽灼來歸。應裏怒攻之。灼奔騰越。
自是屢爲邊患。滇南爲之騷然。後爲暹羅所攻。乃不暇內犯云。
余按滇南諸蠻部。卽漢之徼外西南夷。種類甚繁。明初置六宣
慰使司。曰車里。曰木邦。曰八百大甸。曰老撾。曰孟養。曰緬甸。所

謂滇南六慰者也。

後又增而爲十

此外則孟定孟良威遠灣甸鎮康置

土府州南甸千崖隴川耿馬孟密蠻莫路江置宣撫司芒市孟

連茶山里麻鈕元置長官司其後諸蠻蠢動屢煩征討麓川之

役二思授首武功雖赫而勞費半天下緬甸則莽氏創霸之後

頻歲窺邊烽燧時舉蠻人好反其性固然武鄉侯之攻心至於

七縱七擒馴擾殆非易易也我

朝德威遠播悉主悉臣自西林相國建改土歸流之議草薶禽獮

經營八九年而後定由是諸蠻部盡入版圖熙熙耕鑿無復帶

牛佩犢者其南荒列外藩者僅有南掌緬甸兩國南掌弱小不

足言緬甸則依山負海疆土遼濶我

朝定鼎之初。助鋤明葉。首先効順。乾隆中。崛強犯邊。旋仍賓服。今且間隔印度。爲南海之屏藩。關係亦非淺鮮矣。

按南荒諸蠻部。安南暹羅緬甸。國勢相埒。歐羅巴諸國。自前明中葉。卽航海東來。南洋各番島。處處占立埔頭。三國地皆濱海。豈無繁盛之區。動其盼羨。安南雖有廣南灣之險。而內地商船。時時販鬻。我能往。彼豈不能往。暹羅則內港深通。駛行甚便。乃歐羅巴於此二國。皆未嘗措意。卽緬甸亦僅於海濱荒曠之土。草荆一廛。而未嘗深入割據者何也。若謂因其貧瘠。不屑經營。則又不然。安南最貧。然物產未必遜於諸番島。暹羅緬甸。則風稱豐饒。謂西人概從唾棄。非情也。蓋西人以商賈爲本計。其沿

海設立埔頭專爲牟利。若處處留兵護守則得不償失。南洋諸島大小不同。皆四面環海。不相聯絡。其人則巫來由番族。性既愚懦。復不知兵。地形可以周覽。而盡伎倆。可以一試而知。震以炮火。卽鳥驚獸駭。竄伏不敢復動。故西人坦然據之而不疑。至安南等三國。地雖濱海。而境土則毘連華夏。山川脩阻。丁戶殷繁。進可以戰。退可以守。與各島之孤懸海中者。形勢迥別。又立國皆數千百年。爭地爭城。詐力相尙。戰伐之事。夙昔講求。其意計之所至。西人不能測也。設強據其海口。卽一時倖勝。能保諸國之甘心相讓乎。留重兵則費不貲。無兵則恐諸國之乘其不備。聚而殲旃。市舶雖往而埔頭不設。殆爲是耳。